

## REGIONAL NEWS

HEADLINES:-

1. Mizoram tlawha lo zin Sawrkar laipua Rural Development Minister Kamlesh Paswan chuan ram hmasawn zelah hmarchhak state dinhmun chu ngaih pawimawh a ni a ti.
2. Chief Minister Pu Lalduhoma'n Mizoram leh Assam ramri chingfel tur chuan hruaituluten inrem duhna tak tak rilru pua hma lak tlan a tul, a ti.
3. Prime Minister Narendra Modia chuan vawiin khan thla hmasa ni 30-a Kerala Wayanad-a leiminna hmunte a tlawh
4. President Draupadi Murmu-i chu vawiin khan Timor Leste sawrkarin Civil mite chawimawina sang Grand Collar of Order a hlan.

&lt;&gt;&lt;&gt;&lt;&gt;

UNION MOS VISIT

Sawrkar laipua Rural Development Minister Kamlesh Paswan chuan ram hmasawn zelah hmarchhak state dinhmun chu ngaih pawimawh a ni a ti a, hmasawna chuan mi hnuaihning ber a thlen theih nan hma an la zel dawn tih a sawi.

Union Minister of State for Rural Development Pu Kamlesh Paswan chuan vawiin khan zan khat riakin Mizoram a rawn tlawh a, Muallungthu-a PMAY-G hnuaiia insak tanpuina dawng chungkua a tlawh hnu in Aibawk ah insak tanpuina dawng te leh Sawrkar lam te nen an inkawm a, thu a sawina ah Union Minister chuan sawrkar laipui hmalakna chu mi tin thleng phak tura duan a ni a ti a, ram hmasawn zelah hmarchhak state pawh an dinhmun ngaih pawimawh a ni tih sawiin kawng hrang hranga hma an sawn theih nan theihtawp an chhuah tih a sawi.

Minister chuan Mizorama inkalpawhna chuan hmasawn zelin hmun kilkhawr tlawh pawh anih theih nan sawrkarin hma a la zel dawn a ti a, Mizorama rel lo lut tur chuan hmasawna tam tak a thlen dawn tih a sawi bawk.

Union Minister chuan PMAY-G hnuaiiah Mizoram chhunga sing 3 chuangin tanpuina an dawng thei chu lawmawm atih thu a sawi a, kalkhawmte chu an harsatna te a hnena thlen zel tura chahin hma a lak pui zel dawn tih a sawi bawk.

Union Minister hi zaninah Raj Bhavan ah a riak anga, naktukah New Delhi a pan dawn a ni.

&lt;&gt;&lt;&gt;&lt;&gt;

COUNCIL OF MINISTERS MEETING

Chief Minister Pu Lalduhoma kaihruai Council of Minister nimina thukhawm chuan Mizoram chhim lama airport siam anih theih nana rawtna thehluh an pawm.

Nimina thutkhawmah hian rawtna hrang hrang lut 7 te pawm a ni a, heng zingah hian chhim lama airport siamna tur rawtna chu pawm a ni a, heng bakah hian Lokayukta thuam chakna tura rawtna chu pawm a ni bawk.

Mizoram Lokayukta (Amendment) Bill, 2024 hian state chhunga corruption do kawngah chak zawka hma a lak theih nan ruahmanna siam a ni a, heng bakah hian thla liam ta July ni 1 atanga rampuma hman tan Criminal Laws of India 2023 nena kal kawp theih dan tur ruahmanna a tel bawk a ni.

Mizoram Lokayukta (Amendment) Bill, 2024 hi tun thla August ni 20 leh ni 21-a neih tur Assembly Session ah put luh tura ruamhman a ni bawk.

Nimina Council of Ministers thukhawm hian Mizoram State Higher Education Council Rules, 2024, Mizoram Goods and Services Tax (Second Amendment) Bill, 2024 and draft of the Mizoram Juvenile Justice (Care & Protection of Children) (Amendment) Rules, 2024 te an pawm bawk a ni.

<><><>

CM

Chief Minister Pu Lalduhoma'n Mizoram leh Assam ramri chingfel tur chuan hruaituluten inrem duhna tak tak rilru pua hma lak tlan a tul, a ti.

Ramri chungchang sawia lo zin Assam Border Protection & Development Minister Pu Atul Bora leh a team te a chenna ina a kawmnaah he thu hi sawiin Chief Minister chuan, ramria harsatna chu an hunlai ngeia chin fel tuma hmalak an duh tih a sawi a. Inbiakna hi wawi tam tak a lo awm tawh thin a, thutlukna hi status quo tih a ni deuh zel a. Hei hi inremna tak tak thlentu nilovin a tihkhawtlaina mai a nihna chen a awm a ti a ni.

An inkawmnaah hian, Inremna neih fel hma chu a khawi lam ve ve mahin ramriah buaina thlen thei harsatna siam loh tha an tih thu te inpawh takin an sawi dun a. Pu Atul Bora pawh hian inremna tluantling nei tura inbiakna neih zel chu tha a tih thu sawiin inkawmna hun tha a siamsak avangin Chief Minister hi lawmthu a hrilh a ni.

Chief Minister hi Pu Lalmuanpuia Punte, Adviser to CM chuan a tawiawm a. Pu Atul Bora hi Assam Border Protection & Development official pawimawh Pu Gyanendra Dev Tripathi, Principal Secretary, Pi Prabiti Thaoson, Secretary, Smti Subhalaxmi Deka, Director leh midangten an tawiawm a ni.

<><><>

LENGPUI AIRPORT

NGO Coordination Committee nimin tlaia thukhawm chuan Mizorama thlawhna tumhmun awmchhun Lengpui Airport chu Indian Air Force (IAF) kuta hlan rem an tilo tih an sawi.

Mizorama tlawmngai pawl hrang hrang intelkhawm NGO Coornidation Committee hian tunhnaiah Lengpui Airport chu Indian Air Force (IAF) kuta hlan tumna a awm niin an hria tih sawiin IAF kuta hlan rem an tilo niin an thuchhuah ah an tarlang a ni.

Hetihlai hian August ni 5 khan Adviser to CM Pu TBC Lalvenchhunga kaihhruai Working Committee on Lengpui Airport te chuan an zirchianna report bu Chief Minister Pu Lalduhoma hnenah an hlan a, Working Committee hian India ram hmun danga Airport engemawzat, Airport Authority of India kuta awm mek te an enkawl zui dan te leh private company ten (PPP Mode-a) an kuta awm an enkawl dan an

zirchiang a, Mizoram tana hlawk ber tur ngaihtuahin kil hrang hranga khaikhinna neiin Chief Minister hnenah hian report an thelut a, thuthlukna erawh Chief Minister Pu Lalduhoma kaihruai Council of Ministers meeting kutah a awm a ni.

<><><>

#### WCD

Union Minister of Women and Child Development Pi Mt Annpurna Devi hovin State tina Women & Child Development Minister ten meeting an nei a. Meeting hi Secretary, Anil Malik Ministry of WCD in a kaihruai a ni.

He hunah hian Mizoram Minister Pi Lalrinpuii leh WCD Department Officer te chu NIC Video Conference Hall ah an tel ve a. Pi Lalrinpuii chuan Mizoram Women and Child Development hmalakna hrang hrang te a sawi a. Mizoram chu India rama WCD schemes hrang hrangah titha ber pawl a nih dan te tarlangin; Hmalakna thar hrang hrang an neih tur thu leh theihtawp chhuah zel tum a nih dante a tarlang bawk a ni.

<><><>

#### LADC CEM

Lai Autonomous District Council-a Chief Executive Member, Pu C. Lalmuanthanga leh amah tawiamtu LADC-a mipawimawh te'n vawiin khan hmarchhaka Autonomous District Council hotute inhmukhawmna Shillong a Tripura Castle a neih ah an tel a.

Nizan khan Shillong-a Lai Students' Hostel an tlawh bawk a, CEM Pu C. Lalmuanthanga chuan Shillong-a thiamna sang zawk neihtuma bei mek Zirlaite chu theihtawp chhuaha tanla sauh sauh tura fuihin, Lai hnam hmel lanna an ni tih hre renga, kawng engkimah an nun fimkhur tura chahin, Lai hnam an nihna zahpui lova, Laifate ah theihna bik leh chungchuanna awm chu lantir zelin, an zirlaiah pawh hnamdangte chung-en niturin a chah.

CEM chuan Zirlaite chu ram leh hnam nghahfak an ni tih sawiin, Lai ram leh hnam damna leh a chhiat a thatah nakin lawka mawhphurtur chu tuna zirlaite chu an ni a ti a, taima taka lehkha zir chu hnam tan tun atanga an tangkaina lanchhuahtirna a ni a, Zirlaite chu an Nu leh Pa leh chungte chauhvin an thlir lova, Lai ram leh hnam in nghahkhlel leh beiseina sangtak nen a thlir reng tih a sawi.

LADC Sorkar chuan Zirlaite hmakhua ngaiin a theih ang angin zirlaite tan hma a lak chhunzawm zel dawn tih a sawi nawk

<><><>

#### CHAWNGTE JT NGO

Chawngte Joint NGO chuan Chawngte CHC leh Police station a thawktu leh an mamawh dangte dahbelh sak tura an ngenna leh, Chawngte khawchung kawng siam chungchang sorkar hnena an thlen chungchangah duhthusam hmalakna an hmuh loh avangin na zawka sorkar nawr ni se an ti a.

Chawngte P Community Service Centre ah vawiin khan jt meeting neiin, Chawngte khawtlang mamawh sorkara an thlen chungchang Jt

NGO chuan an ngaihtuah a, Home Department atangin police 8 Chawngte Police Station ah dahbelh sak an ni a, hetih lai hian PWD Minister hnena Chawngte khaw chung kawng chungchang an thlen chu duhthusam a sorkar atanga hmalakna a awm loh thu leh, Health Minister hnena an thlen, Chawngte CHC a thawktu leh hmanraw dang indaihlohna chungchangah pawh hmalakna duhthusam ala awmloh thu tarlan niin, an mamawh an thlen angte hlawhtlinna Ni 13 thlenga an la hmuhloh chuan, Chawngte ah kumin Independence Day chu Boycott nise an ti.

Joint NGO Chawngte chuan May thla khan Press conference ah Mizoram sorkar hnena an khawtlangin an mamawh chi hrang hrang an thlen chungchang leh sorkar hmalakna Aug ni 13 thleng an ngaihchan tur thu anlo sawi tawh a, Chawngte Joint NGO ah hian Chawngte khua NGO lian zual YMA Branch leh Group, YLA Branch leh Sub Headquarters, CYCA, LDSA, MCSU, MSU, MZP, Central Chakma Mahila Samiti bakah Chawngte P Thalai Pawl te an tel a ni.

<><><>

### PM

Prime Minister Narendra Modia chuan vawiin khan thla hmasa ni 30-a Kerala Wayanad-a leiminna hmunte a tlawh. Pu Modia hian vawiin khan Chooralmala thlengin Army ten Bailey Bridge ft 190-a thui an siam chu a tlawh a. He lei siam thar avang hian chak zawkin leimin tuarte chhanchhuah leh leimin thenfai hna thawh theih a ni a. Prime Minister hian sipai hotute leh chhanchhuah hna thawktute a kawm baw a ni.

Vawiina Prime Minister-in Wayanad a tlawhnaah hian Governor Arif Mohammed Khan, Chief Minister Pinarayi Vijayan leh Union Minister of State for Petroleum and Natural Gas, Tourism Suresh Gopi ten an tawiawm a. Chooralmala atang hian MIMS Hospital leh St Joseph School-a chhawmdawlina hmunte a tlawh leh dawn a ni.

<><><>

### PRESIDENT

President Draupadi Murmu-i chu vawiin khan Timor Leste sawrkarin Civil mite chawimawina sang Grand Collar of Order a hlan. Dili khawpuia Presidential Palace-ah Timor Leste President Jose Ramos Horta chuan Pi Murmu-i hi chawimawina a hlan a. President Murmu-i hian President Horta leh Prime Minister Gusmao te a kawm baw a. Pi Murmu-i chuan India leh Timor Leste te chuan inthianthatna nghet tak an nei tih sawiin mipui rorelna democracy tan theihtawp an chhuah a ti a. Timor Leste-in International Solar Alliance leh Coalition for Disaster Resilient Infrastructure a zawm ve theih nan ram pahnihten kawng an zawng mek a ti baw.

President Draupadi Murmu-i chuan tukin khan Timor-Leste a thleng a. New Zealand-ah ni hnih a cham hnuin tukin khan Timor-Leste khawpui Dili a thleng a. Sawrkar chawimawina nen ropui taka lo dawnawn a ni. Nimin khan New Zealand-a Auckland khawpuiah India mite nen hun hmangin President Murmu-i chuan India chu mipui rorelna democracy chak tak entirtu a ni a ti a. Hun reiloteah khawvela economy lian pathumna a ni thuai dawn a ni a ti baw.

<><><>

## EAM IN MALDIVES

External Affairs Minister Dr. S. Jaishankar chuan India in Maldives nena inlaichinna tha a neih theih nan tan a la a ti. Dr. Jaishankar-a hian ni thum cham turin Maldives hi a tlawh a. A cham chungin President Dr Mohamed Muizzu nen an inkawm a. Hei bakah hian Defence Minister Mohamed Ghassan Maumoon pawh a hmu a. Ralthuam leh ram venhimna lama thawhdunnate, tuipei venhimna leh an chhehvela remna leh muanna vawnhim zel dan turte an sawi dun a. External Affairs Minister hian Maldives sawrkara Economic Development and Trade Minister, Minister of Finance leh Maldives Monetary Authority governor te a kawm bawk a ni.

<><><>